



## Biodata

### Marie-Thérèse Choppy

Marie-Thérèse HOSSEN CHOPPY in tre aktiv dan promosyon ek devlopman Kreol Seselwa (KS) depi komanman ladopsyon KS koman lalang maternel pep Seselwa, e son lentrodiksyon dan ledikasyon formel dan bann lannen 80. I ti komans son karyer dan langaz dan 'Teachers' Training College (TTC) an 1957, kot i ti ganny formen koman en ansenyan, e pli tar, i ti ansar sa kolez apre ki i ti'n ansennyen pour plizyer lannen. Son formasyon ti kontinyen kot Murray House College of Education, Edinburg, Lekos, an 1966, kot i ti spesyaliz dan lansennyman Angle. Answit, i ti al fer en Sertifika Avanse dan Ledikasyon kot Liniversite Manchester an 1969, e sa ti kalifye li koman en formater ansenyan. l'n osi fer en kour dan leksikografi ek leksikoloji an Frans kot Ecole International de Bordeaux, an 1983. An 1986, Mm. Choppy ti ganny en Diplonm dan Zesyon kot Lenstiti Nasyonal pour Zesyon (S.I.M).

Mm. Choppy ti vin premye Direkter Lenstiti Kreol, e i ti annefe, enn bann dimoun kle ki ti enplike dan reform Kreol dan bann lannen 80, ki ti anmenn kreasyon en Seksyon Kreol dan Minister Ledikasyon (Lenstiti Nasyonal pour Pedagozi) an 1981, e answit Lenstiti Kreol an 1987. I ti bouz dan domenn lakiltir dan bann lannen 90 e servi koman Direkter Zeneral Kiltir kot i ti enplike dan bokou devlopman artistik e kiltirel tel ki lar vizyel, teat, ladans, lanmizik, e byensir, Festival Kreol.

Lakonplisman personnel Mm. Choppy i enkli en gran varyete pyes teat ki i'n ekri e met an senn, plizyer tradiksyon Kreol bann klasik literer, e plizyer travay kle dan domenn devlopman lengwistik Kreol ki'n fasilitat prosesis standardizasyon Kreol Seselwa. En tel travay i Gramer Kreol Seselwa, an Kreol.

Deryen louvraz Mm. Choppy ti Konseye Spesyal pour Minis Ledikasyon. I ti pran son retrait an 2004, me sepandan, i ankor aktiv dan devlopman Kreol, koman en manm Komite Lalang Kreol. Aktyelman, i pe servi koman lider en group resers pour Diksyoner Monoleng Kreol Seselwa.

